

# Mediomatix – in «novum en l'istorgia»

Radund 260 carnets da lavur e commentaris èn vegnids sviluppads ils ultims sis onns. Els furman la basa per l'instrucziun da rumantsch en ils idioms puter, vallader, sutsilvan e sursilvan. Enfin l'onn 2029 vegn la seria «Mediomatix» cumplettada cun adattar il med en l'idiom surmiran.

SANDRA BALZER/FMR

In mument decisiv per las scolas rumantschas e la Rumantschia: Ils davos meds d'instrucziun idiomatics per la 5. e 6. classa dal stgalim primar èn edids. Els cumpletteschan la seria «Mediomatix» ch'è concepida per l'instrucziun da rumantsch en la 2.-9. classa. Il resultat: betg main che 256 carnets da lavur e commentaris per scolastas e scolasts en ils idioms puter, vallader, sutsilvan e sursilvan. Ils meds èn orientads a cumpetenzas ed uschia cumpatibels cun il Plan d'instrucziun 21. Sper ils meds stampads èn disponibels varsaquants cuntegn digital per la magistraglia ed ils uffants. Era il cusseglier guvernativ *Jon Domenic Parolini* sa legra davart la finiziun gartegiada: «Igl è in novum en l'istorgia, che l'entira Rumantschia instruescha tenor principis equals.»

## Sis onns lavur

La Scola auta da pedagogia dal Grischun è vegnida incumbensada dal Departament d'educaziun dal Grischun d'elavurar tranter il onns 2016-2021 in nov med d'instrucziun da lingua en ils quatter idioms. Actualmain vegn cumplettada la collecziun dal med da lingua «Mediomatix» per l'instrucziun en surmiran. Quai è ina consequenza da la decisun dal 2020 da las



**Han plaschair davart il project gartegià: (da san.) Gian-Paolo Curcio (rectur Scola auta da pedagogia), Jon Domenic Parolini (cusseglier guvernativ), Josy Marie Künzler (manadra meds d'instrucziun Grischun), Rico Cathomas (manader dal project) e Sandro Tomaschett (magister Sedrun).** FOTO SANDRA BALZER

vischnancas surmiranas da bandunar l'instrucziun en rumantsch grischun e turnar tar l'idi-

om. Il project da crear il med surmiran duai cuzzar fin l'onn 2029.